

Festival di Dande Infantil-Hubenil 2011

TANKI LEENDERT - Un otro fin di aña ta den porta y nos no por habri un aña nobo sin nos Dande tradicional! E aña aki un biaha mas Comision Promove Cultura di Centro di Bario Tanki Leendert ta organisa e grandioso festival di Dande Infantil y Hubenil.

E festival lo tuma lugha diaranson 28 di December 2011 na Centro di Bario Tanki Leendert, cuminsando pa 6or di atardi. Comision Promove Cultura kier a tuma e oportunidad aki pa invita tur grupo cu ta bay participa na e festival, pa e ceramento di inscripcion y trekmento di lot cual lo tuma lugha diaranson awor dia 21 di December 2011 pa 7or di anochi na Centro di Bario Tanki Leendert. E Festival lo tin 3 categoria di participacion di Dande. Muchanan di 6 pa 9 aña, 10 pa 12 aña y 13 pa 17 aña. Den tur categoria lo saca un Rey, un Reina y lo tin ganadonan na di 2 y di 3 lugha. Tambe cada grupo por participa cu 1 propio composicion, un cancion tipico dedica na fin di aña.

E intencion di e festival aki ta pa inculca e Dande cu ta nos cultura y nos tradicion den nos muchanan y hobennan pa yuda mantene nos Dande

cu ta un tradicion unico di nos dushi Aruba. Pa e motibo aki ta importante pa nos como hende grandi y musiconan mantene nos mes na e forma tradicional di toca e Dande y e instrumentonan cu nos ta uza pa toca e Dande. Instrumentonan tradicional di paranda di Dande por ta: Fio/Viool, Mandolin, Harmonica di boca, Acordeon, Wiri, Tambora (di 2 banda), Baho acustico, Cuarta, Guitarra, Tre, Harpa, Maraca (tambe ta permiti). Tur otro instrumento cu no ta tradicional di nos Dande, por ehempel, tambora di gaita, furucu, drumset, timbal y instrumentonan electrico no ta permiti. Instrumentonan cu no ta tradicional lo no wordo permiti ariba stage.

Ademas, e Dande mester wordo toca den un compas di 6/8, e melodia di e Dande mester keda den e liñanan tradicional di Dande y no por varia den esaki. Dande ta un cantica cu su Melodia propio y si nos kier mantene nos Dande tradicional nos no por desvia di e melodia aki. Durante festival e Dande por dura mas o menos 3 minuut y mei. E aña aki e grupo tambe por yuda nan participantenan haya punto ora di

husga, como cu a bin cu un categoria nobo pa e huradonan husga e "paranda". Esaki ta encera con e Dande ta wordo toca y presenta door di e agrupacion tambe. Pues esaki tambe por haci efecto riba e puntuacion cu e muchanan

ta haya ora di presenta nan Dande.

Un biaha mas, ta bay un caluroso invitacion na nos dushi pueblo di Aruba pa dia 28 di December, bin asisti na e festival aki, apoya nos hobennan y yuda na sostene y mantene

nos dushi Cultura Arubiano.

Nos Dande! Ban cuid'e!

Pa mas informacion por contact nos via facebook of twitter: www.facebook.com/DandeArubaCBTL of [@DandeArubaCBTL](http://www.twitter.com/DandeArubaCBTL). □

Tur cos cla pa di 39 Festival di Dande

ORANJESTAD - E di 39 festival tipico, propio composicion, tumba di aña nobo y dande reuni a diasabra ultimo na Urataka Center unda e agrupacionnan musical tipico a registra y a lot pa e festival cu lo tuma lugha diamars dia 27 di december 2011 den Club Caiquetio pa 7or di anochi.

Un total di 17 agrupacion lo ta den e festival ;

- La Bomba cu 3 dande 1 tipico un propio composicion, 1 tumba di aña nobo
- Arugaldo cu 1 dande 1 tumba di aña nobo
- Tipico Sorpresa cu 1 dande 1 tipico
- Stima mi cu 3 dande 1 tipico un tumba di aña nobo y un propio composicion
- Amigonan musical cu 2 dande 1 un tipico y 1 propio composicion y 1 tipico
- Amicales cu 2 dande y 1 tipico
- Tipico Reflexion cu 2 dande, 1 propio composicion, un tumba di aña nobo
- Tipico Sorpresa cu 1 dande, 1 tumba di aña nobo
- Chogogo 1 dande y 1 tipico
- Grupo Alegre noord cu 4 dande y 1 tipico, 1 propio composicion
- Robert Maduro y su Alma Folclorico cu 4 dande, 1 tipico, 1 propio composicion, tumba di aña nobo
- Rincon Boys cu 1 dande, 1 propio composicion
- Grupo di Betico cu 2 dande, 1 propio composicion
- Zonido di Antaño cu 4 dande, 1 tipico, 1 propio composicion, un tipico, un tumba di aña nobo
- Tipico los Hermanos cu 3 dande, 1 tumba di aña nobo, 1 tipico, y 1 propio composicion
- Tipico Friends & Family cu 1 dande, un tipico
- Tipico Upgrade cu 1 dande cu 1 tipico

Un total di 27 dande canta pa cabayero y 8 dama 10 tipico 9 tumba di aña nobo y 9 propio composicion nobo. □